

Neum, 05.10.2011. godine
Broj: 500/11

ZAPISNIK I ZAKLJUČCI
SA SJEDNICE SKUPŠTINE
SAVEZA OPĆINA I GRADOVA F BiH

U Neumu je dana 06.10.2011. godine održana Šesta sjednica Skupštine Saveza općina i gradova Federacije Bosne i Hercegovine (u daljem tekstu: Skupština Saveza).

Sjednici Skupštine Saveza prisustvovali su:

1. **g-din Ivo Jerkić**, načelnik Općine Čitluk, predsjedavajući Skupštine Saveza
2. **g-din Vlado Alilović**, načelnik Općine Vitez, predsjednik Predsjedništva Skupštine
3. **g-din Husejin Smajlović**, načelnik Općine Zenica, zamjenik predsjednika Predsjedništva Skupštine
4. **g-din Albin Muslić**, načelnik Općine Bihac
5. **g-din Armin Halitović**, načelnik Općine Bosanska Krupa
6. **g-din Ermin Hajder**, načelnik Općine Bosanski Petrovac
7. **g-din Seid Smailbegović**, načelnik Općine Breza
8. **g-din Hasan Ajkunić**, načelnik Općine Bugojno
9. **g-din Džavid Aličić**, načelnik Općine Doboju Jug
10. **g-din Željko Josić**, načelnik Općine Domaljevac – Šamac
11. **g-din Huso Sušić**, načelnik Općine Donji Vakuf
12. **g-din Radovan Marković**, načelnik Općine Glamoč
13. **g-din Muhamed Ramović**, načelnik Općine Goražde
14. **g-din Sead Čaušević**, načelnik Općine Gornji Vakuf – Uskoplje
15. **g-din Fadil Imširović**, načelnik Općine Gradačac
16. **g-din Hamdo Ejubović**, načelnik Općine Hadžići
17. **g-din Senaid Memić**, načelnik Općine Ilidža
18. **g-din Nusret Mašić**, načelnik Općine Ilijaš
19. **g-din Salem Dedić**, načelnik Općine Jablanica
20. **g-din Mensur Jašarspahić – Suri**, načelnik Općine Kakanj
21. **g-din Rasim Omerović**, načelnik Općine Kalesija
22. **g-din Osman Čehajić**, načelnik Općine Ključ
23. **g-din Luka Čelan**, načelnik Općine Livno
24. **g-din Mehmed Mustabašić**, načelnik Općine Maglaj
25. **g-din Živko Matuško**, načelnik Općine Neum
26. **g-din Refik Lendo**, načelnik Općine Novi Travnik
27. **g-din Alija Hadžić**, načelnik Općine Olovo
28. **g-din Petar Polić**, načelnik Općine Posušje
29. **g-din Jozo Iyančević**, načelnik Općine Prozor - Rama
30. **g-din Fuad Šišić**, načelnik Općine Tešanj
31. **g-din Ivan Vukadin**, načelnik Općine Tomislavgrad
32. **g-din Admir Hadžiemrić**, načelnik Općine Travnik
33. **g-din Ibro Berilo**, načelnik Općine Trnovo

34. **g-din Hamdo Fatić**, načelnik Općine Vareš
35. **g-din Admil Mulalić**, načelnik Općine Velika Kladuša
36. **g-din Munib Alibegović**, načelnik Općine Visoko
37. **g-din Edin Smajić**, načelnik Općine Vogošća
38. **g-din Hakija Osmić**, načelnik Općine Zavidovići
39. **g-din Mato Zovko**, načelnik Općine Žepče
40. **g-din Dragomir Lučić**, sekretar, Općina Kiseljak
41. **g-din Predrag Šupljeglav**, načelnik Odjela za organizaciju, pravne poslove, opću upravu, civilnu zaštitu i vatrogastvo, Grad Mostar
42. **g-din Ante Vuletić**, pomoćnik načelnika za upravu, pravne i kadrovske poslove, Općina Ravno
43. **g-din Igor Kamočaji**, zamjenik gradonačelnika, Grad Sarajevo
44. **g-đa Dragana Solaković**, pomoćnik gradonačelnika, Grad Sarajevo
45. **g-đa Diana Salihbegović**, sekretar državne službe, Općina Stari Grad, Sarajevo
46. **g-đica Mediha Nuhbegović**, sekretar Općinskog vijeća, Općina Tuzla.

Pored gore navedenih, sjednici su prisustvovali i: **g-din Nermin Nikšić**, premijer Federacije BiH, **g-din Zoran Mikulić**, federalni ministar pravde, **g-din Fikret Plevljak**, premijer Zeničko – dobojskog kantona, **g-đa Vesna Travljanin**, direktor Saveza, **g-din Boris Maslo**, direktor, Projekat upravne odgovornosti (GAP), **g-din Slaviša Šućur**, savjetnik, Projekat upravne odgovornosti (GAP), **g-din Mersad Beglerbegović**, savjetnik, Projekat upravne odgovornosti (GAP), **g-đica Jasmina Đikić**, savjetnik, Projekat upravne odgovornosti (GAP), **g-din Jasmin Hošić**, savjetnik, Općina Bihać, **g-din Erik Boven**, direktor, Projekat „Jačanje kapaciteta saveza općina i gradova u Bosni i Hercegovini“ (CDMA), **g-din Ćamil Osmanagić**, projekt menadžer, Projekat „Jačanje kapaciteta saveza općina i gradova u Bosni i Hercegovini“ (CDMA), **g-din Bernardin Bakula**, pomoćnik načelnika za finansije, Općina Posušje, **g-din Senad Subašić**, poslanik u Predstavničkom domu Parlamenta Federacije BiH, **g-đa Alma Zildžić**, poslanica u Predstavničkom domu Parlamenta Federacije BiH, **g-din Samir Hajrulahović**, koordinator, PEP International, **g-din Tabak Selvir**, terenski službenik, PEP International, **g-din Almedin Aliefendić**, predsjednik Odbora za pravdu, opću upravu i lokalnu samoupravu Doma naroda Parlamenta Federacije BiH, **g-din Miroslav Lucić**, pomoćnik načelnika, Općina Domaljevac – Šamac, **g-din Adnan Miralem**, pomoćnik načelnika, Općina Donji Vakuf, **g-đa Ivana Banović**, novinar – urednik, Mostar, **g-din Emanuel Soča**, fotograf – fotoreporter, Mostar, **g-đa Hafeza Sabljaković**, poslanica u Predstavničkom domu Parlamenta Federacije BiH, **g-din Namik Hadžalić**, Projekat LOD - UNDP, **g-din Srđa Obradović**, pravni savjetnik, OSCE, **g-din Petar Micić**, **g-din Sead Maslo**, direktor, Agencija za državnu službu Federacije BiH, **g-din Ferid Kulovac**, pomoćnik direktora, Agencija za državnu službu Federacije BiH, **g-din Marinko Šakić**, USAID, Sarajevo, **g-din Anđelko Maslač**, novinar, Radio HB, **g-đa Mira Grgić**, dopredsjedavajuća Parlamenta Federacije BiH, **g-din Ivica Ružić**, predsjedavajući Općinskog vijeća, Općina Konjic, **g-đica Selma Tipura**, projektni lider, NDC Mostar, **g-đica Vanesa Galić**, projekt koordinator, NDC Mostar, **g-đica Ajla Hadžajlić**, članica Mobilnog tima, NDC Mostar, **g-đica Marinela Primorac**, članica Mobilnog tima, NDC Mostar, **g-đa Zlata Turkić**, viši saradnik za rad sa skupštinskim komisijama i institucijama vlasti, **g-đa Elvira Imširović-Bolić**, viši saradnik za pravna pitanja, **g-đa Selma Fišek**, viši saradnik za pravna pitanja, **g-đa Dženita Kovačević**, viši saradnik za finansijska pitanja i **g-din Edin Demirović**, saradnik za lokalnu samoupravu.

U uvodnim govorima u kojima su se prisutnima obratili **g-đa Vesna Travljanin**, **g-din Ivo Jerkić**, **g-din Živko Matuško**, **g-din Zoran Mikulić** i **g-din Nermin Nikšić**, uslijedilo je potpisivanje Sporazuma o saradnji između Vlade Federacije Bosne i Hercegovine i Saveza općina i gradova Federacije Bosne i Hercegovine.

Sporazum je u ime Vlade Federacije BiH potpisao **g-din Nermin Nikšić**, a u ime Saveza općina i gradova Federacije BiH **g-din Vlado Alilović**.

G-đa Vesna Travljanin je potom pozvala **g-dina Ivu Jerkića** da preuzme predsjedavanje radnim dijelom Skupštine, te pored njega u panelu najavila **g-dina Vladu Alilovića** i **g-dina Husejina Smajlovića**.

Nakon toga je uslijedila kratka stanka za davanje izjava za medije, a po njenom završetku **g-din Ivo Jerkić** je uručio zahvalnicu **g-dinu Husejinu Smajloviću** za njegov doprinos u radu Saveza tokom dvije godine provedene na funkciji predsjednika Predsjedništva Skupštine Saveza, a zatim mu je **g-đa Vesna Travljanin** uručila i prigodan poklon, nakon čega se **g-din Husejin Smajlović** kratko obratio prisutnima.

G-din Ivo Jerkić se zahvalio **g-dinu Husejinu Smajloviću** i naglasio da je sav rad koji je **g-din Husejin Smajlović** uložio u Savez bio na volonterskoj osnovi.

G-din Ivo Jerkić je zatim upoznao prisutne sa Dnevnim redom kako slijedi:

1. Zapisnik i zaključci sa Pete sjednice Skupštine Saveza općina i gradova Federacije Bosne i Hercegovine održane 07.05.2010. godine
2. Izvještaj o radu Predsjedništva Skupštine Saveza općina i gradova Federacije Bosne i Hercegovine za period april 2010. – septembar 2011. godine
3. Izvještaj o radu komisija Skupštine Saveza općina i gradova Federacije Bosne i Hercegovine za period april 2010. – septembar 2011. godine
4. Strategija razvoja Saveza općina i gradova Federacije Bosne i Hercegovine za period 2011 – 2015. godine
5. Strategija lobiranja Saveza općina i gradova Federacije Bosne i Hercegovine
6. Odluka o izmjeni Odluke o obrazovanju Komisije za razvoj i unapređenje lokalne samouprave
7. Informacije:
 - a) Plan rada Saveza općina i gradova Federacije Bosne i Hercegovine za period 2011. – 2012. godina
8. Tekuća pitanja
 - Informacija sa održane Konferencije „Zaduživanje jedinica lokalne samouprave“
 - Lobiranje i zastupanje (predavač: gđa Hafeza Sabljaković, poslanica u Predstavničkom Domu Parlamenta Federacije Bosne i Hercegovine)
 - Predstavljanje rezultata projekata saradnje norveških općina i općina iz Federacije Bosne i Hercegovine
 - Zatvaranje Šeste Skupštine Saveza općina i gradova Federacije Bosne i Hercegovine

G-din Ivo Jerkić konstatuje da je obezbijeđen kvorum potreban za rad Skupštine i otvara raspravu. Nakon što je konstatovao da nema prijavljenih za raspravu, daje Dnevni red na glasanje.

Dnevni red je jednoglasno usvojen.

1. Zapisnik i zaključci sa Pete sjednice Skupštine Saveza općina i gradova Federacije BiH

G-din Ivo Jerkić otvara raspravu. Nakon konstatacije da nema prijavljenih za raspravu, daje Zapisnik i zaključke na glasanje.

Zapisnik i zaključci sa Pete sjednice Skupštine Saveza općina i gradova Federacije BiH su jednoglasno usvojeni.

2. Izvještaj o radu Predsjedništva Skupštine Saveza općina i gradova Federacije Bosne i Hercegovine za period april 2010. – septembar 2011. godine

G-din Ivo Jerkić poziva **g-dina Vladu Alilovića** da izvijesti prisutne o Izvještaju o radu Predsjedništva Skupštine Saveza općina i gradova Federacije Bosne i Hercegovine za period april 2010. – septembar 2011. godine.

G-din Vlado Alilović navodi da je Predsjedništvo Skupštine Saveza na čelu sa **g-dinom Husejinom Smajlovićem** održalo sedam sjednica, te dvije sjednice, nakon što je on preuzeo dužnost predsjednika Predsjedništva Skupštine Saveza. Dalje navodi ukratko dijelove iz kojih se Izvještaj sastoji.

G-din Ivo Jerkić se zahvaljuje **g-dinu Vladi Aliloviću** i napominje da je Savez bio domaćin i organizator Sajma općina i gradova jugoistočne Evrope koji je održan u mjesecu martu na kojem je bilo prijavljeno preko 2000 učesnika i da je prvi put uopće organiziran jedan ovakav sajam. Zatim otvara raspravu o Izvještaju o radu Predsjedništva Skupštine Saveza općina i gradova Federacije Bosne i Hercegovine za period april 2010. – septembar 2011. godine.

Za riječ se javlja **g-din Ermin Hajder**. Pozdravlja prisutne i naglašava da je Savez etabliran kao respektabilan faktor i partner od strane Vlade Federacije Bosne i Hercegovine što potvrđuje i potpisivanje Sporazuma sa Vladom i prisustvo Premijera Federacije Bosne i Hercegovine ovom skupu. Navodi da podržava Izvještaj o radu Predsjedništva i poziva članice da se još aktivnije uključe u rad Saveza i rad komisija Saveza, ali i da paralelno s tim ispunjavaju svoje obaveze prema Savezu. Također, navodi da se Savez prema eksternim partnerima, međunarodnim organizacijama, fondovima te razvojnim agencijama postavio kao jedan ozbiljan i odgovoran nivo vlasti. Apeluje na svoje kolegice i kolege načelnike da prepoznaju potrebe i mogućnosti svoje lokalne zajednice te ih kao takve udruže u jedno sistemsko rješenje i koristeći sve partnere koji se nude od Vlade Federacije Bosne i Hercegovine do međunarodnih faktora i institucija iskoriste to u dobrobit svojih građana.

G-din Ivo Jerkić zahvaljuje **g-dinu Erminu Hajderu** i nakon konstatacije da nema više prijavljenih za raspravu daje na glasanje Izvještaj o radu Predsjedništva.

Izvještaj o radu Predsjedništva Skupštine Saveza općina i gradova Federacije Bosne i Hercegovine za period april 2010. – septembar 2011. godine je jednoglasno usvojen.

3. Izvještaj o radu komisija Skupštine Saveza općina i gradova Federacije Bosne i Hercegovine za period april 2010. – septembar 2011. godine

G-din Ivo Jerkić daje riječ **gospodinu Vladi Aliloviću**.

G-din Vlado Alilović navodi da su u proteklom izvještajnom periodu skupštinske komisije održale šest samostalnih i sedam zajedničkih sjednica te da je na sjednicama vođena rasprava o svim oblastima iz života i rada jedinica lokalne samouprave kao što su: javne finansije, opća uprava, lokalna samouprava, društvene djelatnosti, imovinsko-pravni poslovi, geodetski poslovi i katastar, te prostorno planiranje. Dalje navodi da su komisije aktivno učestvovala u davanju primjedbi na zakone za koje se tražilo izjašnjenje Saveza, kao i kreiranju pojedinih zakona u cjelosti, kao što su Zakon o zaposlenicima u organima jedinica lokalne samouprave, Zakon o šumama i Zakon o premjeru i katastru nekretnina. Također je istakao da su komisije posebnu pažnju posvetile inicijativama iz lokalnih zajednica, a u metodu rada su davale prijedloge rješenja o inicijativama za koje je Predsjedništvo Skupštine Saveza donosilo zaključke, po kojima se postupalo u daljnjoj proceduri.

G-din Ivo Jerkić otvara raspravu. Nakon što je konstatovao da nema prijavljenih za raspravu, daje na glasanje Izještaj o radu Komisija Skupštine Saveza.

Izještaj o radu Komisija Skupštine Saveza općina i gradova Federacije Bosne i Hercegovine za period april 2010. – septembar 2011. godine je jednoglasno usvojen.

4. Strategija razvoja Saveza općina i gradova Federacije Bosne i Hercegovine za period 2011 – 2015. godine

G-din Ivo Jerkić prelazi na tačku Strategija razvoja Saveza općina i gradova Federacije Bosne i Hercegovine za period 2011 – 2015. godine i daje riječ **g-đi Vesni Travljanin**.

G-đa Vesna Travljanin naglašava da je Strategija razvoja Saveza općina i gradova Federacije Bosne i Hercegovine za period 2011 – 2015. godine dostavljena u materijalima za sjednicu i zahvaljuje **g-dinu Erminu Hajderu** koji je rekao da Savez, pored toga što radi na zakonima, radi i na različitim drugim oblastima nastojeći odgovoriti interesima lokalne samouprave u ovoj zemlji. Također navodi da je Savez članica Mreže lokalnih vlasti jugoistočne Evrope koja broji petnaest zemalja i da je Savez organizovao NEXPO – Sajam općina i gradova jugoistočne Evrope. Ističe da je Savez također članica i Kongresa lokalnih i regionalnih vlasti Vijeća Evrope iz Strazbura i da saraduje sa nizom partnera kao što su: GAP, UNDP, OSCE, Švajcarska razvojna agencija SDC sa kojom je Savez radio na serijalu emisija „Moje dvorište“.

G-đa Vesna Travljanin ističe da je u izradi Strategije razvoja Saveza učestvovao znatan broj načelnika ili njihovih zamjenika, da su održane četiri radionice uz pomoć Švedske agencije za međunarodnu razvojnu saradnju – Sida. Zbog obimnosti dokumenta navodi samo viziju Saveza koja glasi: Snažan i uticajan Savez, prihvaćen kao odgovoran partner, sa efektivnom i efikasnom administracijom i navodi strateške ciljeve Strategije kako slijedi:

prvi strateški cilj: Savez kao aktivan i uticajan učesnik reformi za unapređenje lokalne samouprave,
 drugi strateški cilj: Savez kao čvorište saradnje članica, međunarodne saradnje i evropskih integracija,
 treći strateški cilj: kompetentna, efektivna i efikasna administracija kao centar razmjene ideja, dobrih, praksi i informacija i pokretač aktivnosti Saveza, i
 četvrti strateški cilj: otvorenost i finansijska održivost Saveza.

Po završetku izlaganja **g-đe Vesne Travljanin**, **g-din Ivo Jerkić** otvara raspravu po ovoj tački.

Nakon konstatacije da nema prijavljenih za raspravu, **g-din Ivo Jerkić** stavlja na glasanje Strategiju razvoja Saveza općina i gradova Federacije Bosne i Hercegovine za period 2011 – 2015. godine.

Strategija razvoja Saveza općina i gradova Federacije Bosne i Hercegovine za period 2011 – 2015. godine je jednoglasno usvojena.

5. Strategija lobiranja Saveza općina i gradova Federacije Bosne i Hercegovine

G-din Ivo Jerkić daje riječ **g-đi Vesni Travljanin**.

G-đa Vesna Travljanin naglašava da se na sjednici Predsjedništva Skupštine Saveza razmatrao ovaj dokument i da je u njegovu izradu uloženo mnogo truda, te da isti sadrži razrađene procedure lobiranja. Ističe da je cilj da se Strategija lobiranja primjenjuje i najavljuje centralnu temu Skupštine „Lobiranje i zastupanje“ koju će prezentirati gđa Hafeza Sabljaković, poslanica u Predstavničkom Domu Parlamenta

Federacije BiH i članica Komisije za lokalnu samoupravu Predstavničkog doma Parlamenta Federacije BiH. G-đa Vesna Travljanin predlaže da se Strategija lobiranja usvoji.

G-din Ivo Jerkić konstatuje da se svi trebaju više i ozbiljnije uključiti u proces lobiranja i otvara raspravu.

G-din Munib Alibegović ističe da je čekao ovu tačku da iznese svoje mišljenje koje je iznosio i prilikom izrade ovih dokumenata Saveza. Smatra, da ono što je jasno postavljeno, a čemu se vjerovatno neće posvetiti dovoljno pažnje, je ne samo lobiranje Saveza kao institucije prema Vladi Federacije BiH, nego ističe da će lokalnim zajednicama pojedinačno nedostajati lobiranje prema kantonalnom nivou vlasti i spuštanje tih odnosa na kantonalni nivo koji se ne može preskakati, jer za razliku od Republike Srpske, u Federaciji BiH ne postoji Ministarstvo za lokalnu samoupravu. Dalje, navodi da će se dodatno ta saradnja morati proširivati i pokušati djelovati i preko kantonalnih vlada, odnosno preko utvrđivanja određenih kriterija kada su u pitanju raspodjele sredstava prema najnižem nivou vlasti, odnosno lokalnoj samoupravi. Konstatuje da se moraju utvrđivati federalni kriteriji spram raspodjele na kantone, a onda unutar kantona prema lokalnim zajednicama i navodi da se ta činjenica mora fokusirati.

G-din Radovan Marković pozdravlja uvaženi skup i koristi priliku da se ispred Općine Glamoč obrati skupu, te navodi da postoji mnogo ovakvih praksi u lokalnoj zajednici gdje se usvajaju strategije razvoja, strategije i planovi lobiranja, a da dolazimo iz općina kao što je Glamoč gdje ne primjećujemo da se išta promijenilo u nekom mandatnom periodu trajanja i ovoga Saveza i ove lokalne vlasti. Ističe da je u okviru Hercegbosanskog kantona još uvijek moguće na teritoriji Općine Glamoč ući u tuđi posjed, uzurpirati ga, maltretirati vlasnika i da vam za to nikada niko ne sudi, jer negdje na nekom sudu to nikada neće stići na dnevni red. Smatra da nas to ne bi toliko ni zabrinjavalo da istu takvu stvar ne radi i država Bosna i Hercegovina, odnosno Vlada Federacije BiH koja je jednom prilikom u Glamoču usvojila javni interes, napravila poligone za vojske Federacije i vojske NATO – a, a onda povukla taj javni interes, nikada ne obeštećujući stanovnike Općine Glamoč za uzurpiranje, korištenje njihove zemlje itd. i navodi da se taj proces i danas ponavlja u trenutku ove aktuelne Vlade. Konstatuje da je u Glamoču 2007. godine stiglo pismo da poligon Glamoč nije perspektivan, navodi da se sada u Glamoču uništavaju zaostala minsko-eksplozivna sredstva, da postoje uplašeni stanovnici koji ne znaju šta je to, a ljudi iz UNDP – a ih uvjeravaju da je to neštetno, da je to zdravo, pa se oni pitaju zašto to nije zadržano kod svojih kuća ako je toliko zdravo i ljekovito i sl. Ističe da ne bi ovo u ovoj tački spominjao pošto je ovo tema možda za neke druge stolove, ali smatra da je i ovo način lobiranja. Konstatuje da u Općini Glamoč nemaju dovoljno ni finansijskih, a ni obrazovnih kapaciteta da zastupaju Općinu koja je svedena na 30 % predratnog stanovništva upravo postojanjem poligona, neobeštećivanjem stanovništva, te držanjem te zone u produženih petnaestak godina ratnog stanja i ističe da je i današnje stanje slično tome. Misli da je i ovo način da se lobira za situaciju gore, pošto su se obraćali Ministarstvu odbrane, raznim institucijama i nikada nisu dobili odgovor ko to, zašto i u ime koga ima nekakav poligon. Smatra da bi kao lokalna vlast trebali imati komunikaciju sa federalnim vlastima. Navodi da ne okrivljuje Savez jer mu se po ovome pitanju nikada nisu ni obratili, ali ga poziva da tamo gdje nema dovoljno finansijskih i drugih kapaciteta pomogne, prepozna to, dođe i u takve zajednice, da ne budemo gosti samo tamo gdje su nam članovi Predsjedništva, Skupštine itd., nego i u drugim zajednicama koje nas možda ne mogu materijalno i finansijski dobro dočekati kao ove druge, ali smatra da ih trebamo prepoznati. Ističe da će se javiti i po nekim drugim tačkama gdje bude prepoznao da Savez nije pomogao lokalnoj vlasti, gdje nekim matematičkim računama, ono što se radilo i rješavalo pred sudom, danas se šalje prema nekim slabijim pozicijama nego što je to bilo u trenutku pokretanja tužbi i traženja zaštite prava na lokalnu samoupravu. Na kraju se izvinjava skupu ako je bio preopširan ili možda pod nekom dozom naboja, ali ističe da je ovo jedini način da se njihov glas čuje.

G-din Refik Lendo navodi da je i on također razmišljao kada će se javiti za riječ, ali ističe da želi odmah na početku da kaže da smo počeli zaista sebe da hvalimo, i Predsjedništvo i Savez, a da Vlada nikada nije usvojila ni jedan zakon za naš silni rad. Smatra da se, prema tome, ne trebamo puno hvaliti, jer nismo uspjeli u lobiranju. Konstatuje da želi, pošto je ovdje prisutan premijer, iznijeti jedan problem koji se javio na prostoru Srednjobosanskog kantona, a koji se tiče lokalnih zajednica po pitanju komunalne infrastrukture, odluka o komunalnim naknadama pa i naplate podzemnih i nadzemnih instalacija. Misli da je potrebno uzeti harač i Telekomu i Elektroinstalacijama, jer je tamo gdje oni kopaju i gdje su uzurpirali zakonska nadležnost lokalne zajednice. Smatra da je lobiranje Telekoma, kablovskih operatera i drugih kod Federalne vlade tako da je sada premijer pokrenuo kod Ustavnog suda postupak za poništenje općinskih odluka i vjerovatno će u tome i uspjeti, jer je lobi Telekoma jači od lobija lokalne zajednice. Navodi da je zvanično dobio da se odluke koje su donijeli i usaglasili na prostoru Srednjobosanskog kantona trebaju proglasiti neustavnim. Ističe da će za lokalne zajednice zaista biti problem vraćanje sredstava koja se naplaćuju već godinu ili dvije godine dana ako se te odluke proglaše neustavnim. Konstatuje da je potrebno lobiranje sa svih strana i izražava nadu da će potpisivanje Sporazuma sa Vladom Federacije BiH osigurati jednu koordinaciju i omogućiti da lokalna zajednica ostvaruje prava koja joj pripadaju u skladu sa zakonskom regulativom.

G-din Hamdo Ejubović naglašava da mu je zaista drago što su danas ovdje federalni premijer, neki od ministara u Federalnoj vladi i dva premijera kantona i da im se iz prve ruke, mora jasno kazati da je položaj lokalne samouprave jako težak, na mnogim mjestima i užasno težak. Ističe da današnji zaključci treba da idu u pravcu jačanja našeg položaja i to zakonskim putem, tako što će se donijeti zakoni koji će omogućiti lokalnim zajednicama da na pristojan način udovolje potrebama građana u onoj mjeri u kojoj građani to od njih očekuju. Naglašava da nismo donijeli ni jedan zakon, jer ni Federacija ni kantoni neće da se odreknu svojih privilegija i propuste dio prihoda lokalnoj samoupravi kako bi ona mogla udovoljiti prema onih 80 % potreba građana koji to od lokalne zajednice očekuju. Ističe da je to sigurno tako i da bi anketa u općinama to sigurno potvrdila i pokazala da 95 % građana ne zna gdje su vrata od kantona i gdje se nalaze Federalna ministarstva, ali svi znaju gdje se nalazi općina i ko je načelnik općine. Navodi da se građani jedino u svojim općinama obraćaju bez imalo ustručavanja i da tim ljudima treba omogućiti bolji život na način da se usvoje potrebni zakoni. Ističe da je ovo lobiranje iz prve ruke i da je lokalnim zajednicama zaista teško.

G-din Ivo Jerkić naglašava da je jedan vid lobiranja sve ovo što se reklo i da je stanje svih na lokalnom nivou nezadovoljavajuće. Navodi primjer obraćanja Federalnoj vladi sa inicijativom za izmjenu Zakona o pripadnosti javnih prihoda, koja nas je uputila na kantonalnu vladu, a ona opet na Federalnu, što predstavlja prebacivanje odgovornosti i konstatuje da su svi uskraćeni kada je u pitanju porez na dohodak, osim Zapadno – hercegovačkog kantona koji je donio Odluku prema kojoj je omjer 50 % kantonu i 50 % općini, dok je svim ostalim općinama pripao omjer od 34 %, odnosno zakonski predviđeni minimum. Smatra da se radilo i pokušavalo, ali se nije uspjelo i izražava slaganje sa činjenicom da je sve što su rekli kolege načelnici jedan vid lobiranja, te ističe da je potrebno iskoristiti prisustvo predstavnika Federalne i kantonalnih vlada kako bismo iznijeli svoje mišljenje. Naglašava da niko od nas nije zadovoljan određenim zakonima i ponavlja da se život ljudi odvija na lokalnom nivou i da građanin prvo traži da zadovolji svoje potrebe u općini, jer je općina prva karika uz narod i mjesto gdje za građane i počinje i završava život, te ističe da općina često puta ne može odgovoriti na pojedine zahtjeve građana bilo da je u pitanju mirovina, socijalna zaštita ili bilo koja druga prava koja građani traže, dok su s druge strane načelnici direktno izabrani, neki prvi, neki već drugi put od tih istih građana.

G-din Emir Bubalo ističe da mu je zadovoljstvo pozdraviti premijera g-dina Nermina Nikšića, kolege načelnike i premijere Zeničko – dobojskog i Srednjobosanskog kantona. Naglašava da, uz sve zahvalnosti i aktivnosti na kojima je Savez do sada radio, a znamo da Savez svake godine napreduje u svom radu, ne možemo biti zadovoljni i bi bilo ružno da ova Skupština prođe, a da se ne iznesu naši

problemi. Navodi da zna da premijer Nikšić te probleme vrlo dobro poznaje, obzirom da je radio u lokalnoj zajednici i smatra da nama nije kriv niko drugi nego mi sami. Napominje da je i na prethodnim skupštinama govorio da šest godina imamo neimplementiran Zakon o principima lokalne samouprave, te se nadamo da će to uraditi neko drugi umjesto nas. Naglašava da mi to moramo raditi, pripremiti izmjene zakona, naći ekipu ljudi koja će to raditi, jer vrijeme prolazi a problem postoji. Navodi da deset godina u Hercegovačko-neretvanskom kantonu plaćaju prevoz đaka i materijalnih troškova osnovnih škola i nastavnika, te imaju problem da se nastavnici ne uklapaju u prevoz pa onda tuže općine, odnosno škole, što dovodi do blokade škola. Obrazlaže da kad se Općina obrati Ustavnom sudu, Ustavni sud odgovori da su kantoni nadležni za donošenje zakona, a mijenjajući Zakon o obrazovanju kantoni su promijenili te stvari, a ostavili su Zakon o pripadnosti javnih prihoda gdje su oni nadležni i gdje su po tom osnovu uzeli finansijska sredstva. Ističe da postoji hiljadu problema, da se ne treba zavaravati. Naglašava da se svi nivoi vlasti zadužuju, a da su općine tek od prošle godine dobile mogućnost da se zadužuju i to ograničeno do 10 % i da je to dobro, ali da ni jedan viši nivo vlasti nema ograničenja u zaduživanju. Ističe da se vraćanje svih vanjskih dugova obavlja preko zbirnog računa Uprave za indirektno oporezivanje i da općine vraćaju indirektno za sve one nivoe vlasti koji se zadužuju jer se svi vanjski dugovi prvo otplaćuju sa zbirnog računa pa se tek onda raspoređuje ostatak, te naglašava da se to mora mijenjat. Konstatuje da je prisutan relativno mali broj članova Skupštine i da do sada nije prisustvovao manjem sazivu Skupštine. Smatra da nešto nije u redu, da je došlo do neke apatije, a da je situacija sve gora i gora. Naglašava da moramo imati konkretne prijedloge i da se ne zavaravamo da smo zadovoljni ako svi znamo da nismo. Navodi primjer uvođenja trezorskog poslovanja, ističe da nema ništa protiv toga, ali da će neke općine imati hiljadu problema usljed nedostatka kapaciteta i stručnosti, te da lokalna zajednica ne može planirati budžet za trezorsko poslovanje što znači da će svako vijeće biti potrebno raditi rebalans budžeta. Smatra da je Skupština trebala biti bolje pripremljena sa pripremljenim zaključcima. Naglašava da i on također nema potrebu uopšte ići u kanton, jer će kanton, ako nešto može stopirati i blokirati, a pomoći neće ni slučajno, niti može pomoći sam sebi jer je u minusu i ne može funkcionisati. Navodi da se neke stvari moraju precizirati. Podsjeća da je g-din Jašarspahić izašao sa posljednje sjednice Skupštine zbog Zakona o zaštiti i dobrobiti životinja i da se ništa u vezi s tim nije uradilo za ovo vrijeme, naglašavajući da iako se pripremalo i aludiralo, ništa se nije uspjelo promijeniti, te je potrebno da mi pripreмимо zakon, odnosno izmjene zakona i počnemo lobirati u državnim, federalnom i kantonalnim parlamentima, jer u protivnom, nećemo ništa ni uraditi. Smatra da jednom trebamo sami sebe kritikovati da nismo dovoljno radili, da su lokalne zajednice ostale bez prihoda, izuzev slučaja u vezi sa Zakonom o izdvajanju i usmjeravanju dijela prihoda preduzeća ostvarenog korištenjem hidroakumulacionih objekata koji je doveo do povećanja budžeta određenih općina, a da su one općine kod kojih to nije slučaj u vrlo teškoj situaciji kao i one koje nisu centri kantona i entiteta.

G-din Igor Kamočaji naglašava da bi se prije svega trebali fokusirati na ono što jeste ova tačka dnevnog reda, tj. na dokument Strategije lobiranja i ističe da želi pohvaliti radnu grupu, autore i urednike ovog teksta. Smatra da je metodološki pristup izradi jednog kapitalnog dokumenta koji trasira pravac lobiranja naših problema sada pred nama i da u lobiranju moramo imati sistem, proces, vrijeme koje je neophodno i metodu kako doći do rješavanja problema. Navodi da nije shvatio da je danas, zahvaljujući prvom čovjeku Federacije koji je ovdje, ovo jedno ispovjedno vijeće naših problema, ali je svjestan da su prilike takve da se ne možemo uvijek sresti sa onima koji su nam neophodni u lancu za rješavanje problema, pa da niko ne treba zamjeriti što nekada možda i mimo tačke dnevnog reda kažemo ono što nas boli. Navodi da je na strani broj 8 Strategije lobiranja jasno definisano koji je to put, a da je ostalo red prioriteta koje će Savez, Skupština odnosno Predsjedništvo utvrditi. Ističe da je današnje potpisivanje Sporazuma sa Vladom Federacije BiH jedna kapitalna stvar za Savez općina i gradova i za lokalne zajednice, jer je bitno da prije svega postoji razumijevanje viših nivoa vlasti u rješavanju ovih egzistencijalnih pitanja lokalnih samouprava. Još jednom upućuje čestitke i naglašava da je danas lobiranje nauka, da postoje odsjeci i naučnici koji se time bave. Podsjeća da su on i kolege samo predstavnici građana koji mogu biti i profesori i zanatlije itd., ali da nam je neophodno da imamo jedan

dokument i metodu putem koje ćemo raditi. Na kraju poziva u ime Predsjedništva Skupštine Saveza da se usvoji ovaj dokument koji je neophodan za dalje djelovanje.

G-din Hamdo Fatić pozdravlja prisutne i ističe da će biti malo konkretniji i ukazati na nekoliko bitnih stvari. Prvo navodi pitanje neravnomjernog razvoja Bosne i Hercegovine što je dovelo do toga da neke općine idu u 23. vijek, a da neke ostaju u 19 vijeku. Naglašava da će ga u ovome najbolje razumjeti kolega iz Glamoča i predstavnici još nekih općina. Naglašava da ne zna da li u Bosni i Hercegovini postoji još općina koje imaju 30 km regionalnog puta u kategoriji makadama. Ističe problem neprimjenjivanja zakona i navodi Zakon o šumama koji za Općinu Vareš znači 15 % budžeta svake godine. Dalje konstatuje da se donose zakonski propisi, a da se ne pita lokalna zajednica i navodi da je najnoviji primjer za to Zakon o predškolskom obrazovanju. Moli da se malo više obrati pažnja na Zakon o zdravstvu i smatra da je zdravstvo pored šumarstva najkorumpiranija oblast u Bosni i Hercegovini. Naglašava da treba spriječiti da ljekari u državnim bolnicama rade i u privatnom sektoru i smatra da nije problem plaćanje zdravstvenih usluga nego duga čekanja pacijenata. Ističe problem sa esencijalnom listom lijekova, te navodi da u Varešu cijena određenog lijeka iznosi 200 KM, dok je u Sarajevu ta cijena 9 KM i naglašava da je čuo da ministar na esencijalnoj listi štedi 12 miliona. Sugerše da je potrebno da se zdravstvo razvija po oblastima, jer Bosna i Hercegovina nije velika država, te je potrebno bolničke kapacitete adekvatno raspoređivati. Na kraju iznosi da je potrebno, kada je u pitanju lobiranje, ići onako kako je predviđeno u strategiji.

G-din Albin Muslić zahvaljuje svim prisutnim i ističe da je po prvi put na ovom jednom jako lijepom sastanku i ističe da bi želio iskazati nekoliko svojih impresija vezano za funkcionisanje općine i iznijeti nekoliko svojih zapažanja u devetomjesečnom mandatu kojeg je dobio od strane građana. Naglašava da bi današnju temu trebalo itekako ozbiljno shvatiti kako bi uspostavili jedan jasan sistem. Navodi činjenicu da su u proteklom periodu imali situacije da su se sredstva koja se prikupljaju po svim osnovama, npr. od JSM licence, u pravilu dodjeljivala na osnovu poznanstava i veza pojedinaca u strukturama vlasti. Ističe da to općinama apsolutno ne odgovara. Smatra da je potrebno prvo uspostaviti jasne kriterije koje se to oblasti žele finansirati i u kojima se želi što prije doći do konkretnog rezultata, a na temelju toga kako lokalne zajednice mogu pronaći svoj interes i gdje mogu doći do sredstava. Ističe da smatra da je aktuelna Vlada u proteklom periodu pokazala spremnost da pomogne lokalnim zajednicama i da se na jedan interaktivni način dođe do krajnjeg rezultata, što podrazumjeva konkretne projekte na području naših općina. Navodi da bi ovu priliku iskoristio da uputi svoje viđenje o aktuelnom problemu nezaposlenosti, te naglašava da su načelnici u općinama na žalost izvrgnuti sudu javnosti i potrebama građana koji od njih očekuju da im se osiguraju radna mjesta. Iznosi mišljenje da je Bosna i Hercegovina jako komplicirana, strogo birokratizirana zemlja koja ponekad investitora prije otjera nego što ga privuče u naše lokalne zajednice. Navodi primjer poslovne zone Kamenica u Bihaću gdje imaju 10 000 m² državnog zemljišta koje je opredjeljeno za industrijsku proizvodnju. Naglašava da kad se pojavi strani investitor, prvo se interesuje koliko to košta, a odgovor na njegovo pitanje je da 10 000 m² u poslovnoj zoni Kamenica, što je u stvari obična travnata površina, košta 830 000 KM. Ističe da tog trenutka svi njihovi razgovori završavaju i taj investitor gleda kako će pronaći svoje mjesto možda negdje u Bugarskoj ili Rumuniji ili negdje drugo. Ističe da je ovo samo jedan eklatantan primjer koji se susreće u općinama, te ističe da na ovaj način jednostavno ne možemo biti u funkciji našeg osnovnog zadatka, a to je da se u Bosni i Hercegovini stvara nova vrijednost i novi izvori PDV-a koji će se kasnije moći ulagati u infrastrukturu i ostalo. Predlaže da se zamoli premijer g-din Nikšić i resorna Vlada Federacije Bosne i Hercegovine da se, posebno u domenu razvoja poduzetničkih zona, stvaranja novih radnih mjesta, uproščavanja zakonske regulative, napravi distinkcija između industrijske proizvodnje i svega onoga ostalog što ide sa tim. Na kraju izlaganja izražava očekivanje da će današnja Skupština uroditi plodom i da će se na čelu sa Vladom Federacije Bosne i Hercegovine jako brzo doći u priliku da se jasno definiraju naši ciljevi i da se što prije dođe u situaciju da počnemo otvarati nova radna mjesta za građane koji to i očekuju.

G-din Senaid Memić pozdravlja sve prisutne i izražava žaljenje što je on tu danas umjesto svog prethodnika. Ističe da je Savez u g-dinu Ameru Čenanoviću imao velikog prijatelja i dobrog radnika i da ga u to ime želi spomenuti, te naglašava da naše obaveze u vezi sa njegovim djelom i njegovim namjerama i dalje ostaju. Smatra da ćemo biti dostojni i adekvatni da to učinimo onako kako je on to mislio i trebao. Ističe da se javio zbog dvije stvari i naglašava da Savez hitno mora u okviru svojih djelovanja napraviti zaštitu za članice, odnosno za načelnike tj. za one koji učestvuju u njegovom radu od medija. Navodi da mediji vrlo često prave informaciju, umjesto da je prenose i da vrlo često podgrijevaju gluposti i predstavljaju ih narodu koji je nezaposlen i koji je u ekonomskoj krizi kao nešto najvažnije na svijetu. Navodi primjer pasa koji hodaju ulicama i koji su predstavljeni kao najveće zlo na ovom svijetu. Konstatuje da je imao slučaj da je zvao Savez za pravni savjet i tražio g-dina Ljubišu Markovića kao prijatelja Saveza, kao pravnika i kao bivšeg načelnika Općine Centar Sarajevo koji mu je rekao da je on notar, da ga se to ne tiče i da to ne zna. Smatra da ga više ne trebamo zvati da nam drži seminare jer se njega to ne tiče. Naglašava da traži dvije stvari: da Savez jednostavno na sve ove žalbe koje mi ne možemo sami riješiti nađe tijelo kome se možemo barem prijaviti da se evidentira slučaj i da to ne bude slučaj Senaida Memića, načelnika Općine Ilidža, nego da to bude slučaj svih načelnika jer se to u svakoj općini može desiti, a pogotovo kad je u pitanju međuentitetska saradnja i traži da imamo tijelo koje će čuti kada načelnik kaže „pakuju me novinari“. Navodi da mu je jasno da novinari hoće da prodaju novine, ali ne trebaju praviti vijesti. Naglašava da moramo zbog mjesta na kojima sjedimo, zbog posla koji radimo i zbog obaveza koje smo preuzeli, biti Savez koji će obilježiti one koji više nikako ne smiju dobiti informaciju jer za mizeran iznos uporno lažu o načelniku i da to nije u redu i da je nepošteno, te da takvog čovjeka treba staviti na crnu listu da on više nije novinar, nego je kriminalac, a da one koji su dobri nagradimo i da im damo podršku.

G-din Ivo Jerkić konstatuje da se otvorilo puno problema kroz Strategiju lobiranja i da je sve ovo što je izneseno jedan vid lobiranja. Predlaže da se ova tačka privodi kraju.

G-din Mensur Jašarspahić – Suri pozdravlja prisutne i izražava zadovoljstvo činjenicom da je s nama uvaženi premijer Nikšić i premijeri kantona. Ističe da će se fokusirati na dvije stvari. Navodi eklatantan primjer izričite nepravde prema građanima u Kaknju. Naglašava da ovo nije na adresu premijera, jer je na početku rekao da želi sa nama saradivati i smatra to vrlo dobrim, te se nada da ćemo zajednički napraviti puno toga u ovoj državi. Navodi primjer da u Kaknju na lokalitetu rijeke Ribnice, sa lijeve strane, koncesiju redovno plaća tvornica cementa i da to nikad nije bilo upitno, dok s desne strane iste te rijeke uzvodno, rudnik desetina godina vadi milionske tone uglja, odnosno 105 godina koliko egzistira u Kaknju i da ne plaća koncesiju. Smatra da je to jedna frapantna nepravda. Navodi da ono što Općina Kakanj dobije od premijera kantona ne može biti ni blizu dovoljno da riješi ono što je uništeno eksploatacijom kamenog uglja za radi više sile. Ističe da bi bilo dobro napraviti jednu iskrenu ljudsku sinergiju i reći da ovo što radimo trebamo dovesti do kraja. Navodi da ne može ni jedan načelnik koji ima rudnik uglja uvijek biti sentimentalni i uvijek puštati zbog teškog stanja rudara da se ne plaćaju koncesije, te ističe da ako se to dešavalo petnaestak poslijeratnih godina, da su ti rudnici ojačali do te mjere da imaju plate 5000 KM, da imaju mogućnost da djecu šalju na studije, magisterije, doktorate itd., da bi bio sretan čovjek, međutim, navodi da je obrnuto, da općina pomaže rudnicima da stipendiraju djecu, liječe sebe i supruge i svoju djecu. Moli premijera da se uzmu u najozbiljnije razmatranje naše primjedbe na Zakon o koncesijama. Ističe da je druga stvar da se mora sa Elektroprivredom Bosne i Hercegovine napraviti jedan ozbiljan sastanak, a onda ići na sud. Navodi primjer iz prakse, te ističe da govori kao načelnik, a ne u lično ime, da u bilo kom selu, kad općina uradi projekat, obezbijedi pare, kupi potreban materijal, kupi i instalira mjerno mjesto, uložiti silne pare, sve investira, onda dođe Elektroprivreda, taj dan prikopča struju u selu, školi, džamiji, crkvi, nebitno gdje i od tog trenutka plaćamo cijenu javne rasvjete u cijeni industrijske struje. Ističe da nigdje na svijetu nema da neko nekome sve investira, a da on zaračunava cijenu i naplaćuje i radi šta hoće. Smatra da je to frapantni monopol. Naglašava da će ove godine platiti 600 000 KM cijenu utroška električne energije u javnoj rasvjeti i da ako ne plati pet dana, ide akceptni

nalog i kamata. Ističe da se u izgradnji države moramo podijeliti šta ko radi, ali u pravcu ukupne politike države, entiteta, kantona, u ovom slučaju Federacije i naglašava da se moramo dogovoriti hoćemo li konačno početi raditi za narod ili ćemo samo sa konferencija poručivati nešto narodu. Misli da se Savez ovime mora pozabaviti, da bi otvorili procedure i iz najboljih ljudskih i patriotskih namjera, jer jedino ovu državu imamo, da napravimo nešto što će nama biti lakše, građanima korisnije, a isto tako da oni koji rade posao imaju razumijevanja da mi nismo negativni prema tim ljudima, institucijama, rudnicima, elektroprivredama itd., nego da želimo da radimo svi zajedno za našu državu i za naše ljude.

G-din Ivo Jerkić naglašava da je i ovo što je iznio g-din Mensur Jašarspahić – Suri dobar dio lobiranja, ali sa druge strane.

G-din Ibro Berilo pozdravlja sve prisutne, posebno Federalnog premijera i ističe specifičan problem u Općini Trnovo za koji misli da je specifičan problem i u Evropi, a ne samo u Bosni i Hercegovini. Ističe da je Vlada Federacije BiH uz pomoć Parlamenta Federacije BiH proglasila 85 % prostora kao zaštićeno područje u Općini Trnovo. Naglašava da nije problem to što se proglašilo 85 % prostora kao zaštićeno područje, nego je problem to što je u odluci još navedeno da općina, dok se ne donese Prostorni plan za zaštićena područja od značaja za Federaciju, ne može donijeti niti izmijeniti ni jedan ni regulacioni plan ni detaljni plan i navodi da to traje ukupno osam godina. Ističe da je za tih osam godina općina u prosjeku izgubila 32 miliona KM. Naglašava da su općine Trnovo i Hadžići u ovoj borbi bile usamljene osam godina pišući, boreći se pred zastupnicima Parlamenta Federacije BiH i nikad nisu uspjele da izmjene ni dio te odluke, a također nije izvršena ni ekonomska naknada tim lokalnim zajednicama zato što im je uzurpiran prostor, odnosno što im je uveden politički embargo na jedan prostor. Smatra da to govori o odnosu viših nivoa prema lokalnim zajednicama. Ističe da Općina Trnovo ima najbolje vode u Bosni i Hercegovini, ali da te vode ne mogu staviti u funkciju zbog nedostatka zakona, prije svega Zakona o koncesijama i Zakona o javno – privatnom partnerstvu. Misli da se podhitno i što prije određeni zakoni koji su danas spominjani moraju usvojiti, ukoliko želimo da idemo naprijed bržim koracima. Ističe da se nije mislio javiti za riječ, ali je htio da Federalni premijer čuje ovo, te ističe da mu je poznato da je g-din Nikšić u periodu dok je bio u Parlamentu Federacije BiH, bio protiv donošenja ovakvih odluka, jer one nisu bile u funkciji razvoja lokalnih zajednica. Naglašava da je apsurd još veći iz razloga što nijedan projekat koji su u posljednje četiri godine kandidovali u Federalni fond za zaštitu nije odobren, te naglašava da je taj fond formiran upravo zbog tih zaštićenih područja i navodi da bi se određeni razvojno-strukturni projekti trebali finansirati iz istog na tim zaštićenim područjima. Ističe problem u vezi sa Zakonom o šumama i navodi da se u Sarajevu momentalno ne može naplatiti u skladu sa uredbom ni onih 5 % od cijene drveta na panju kao izvornog prihoda lokalne zajednice koji iste treba da naplate od strane Sarajevo šuma. Naglašava da je to iz razloga što se novac više ne uplaćuje preko resornih ministarstava, nego se prebacuje direktno preko javnih preduzeća koja grecaju u ogromnim gubicima i koja ne mogu taj novac nadomjestiti prema lokalnim zajednicama. Lično misli, da kada su u pitanju šume, pošto je na prostoru Općine Trnovo otprilike 30 % prostora prekriveno šumama, potrebno da što prije Federacija BiH kao vlasnik šuma, počne dodjeljivati šume na koncesije, a ne da njima upravljaju javna preduzeća i da općine od toga imaju samo 5 %. Smatra da, ako je cijena drveta na panju 35 ili 40 KM, onda bi ti prihodi trebali biti itekako veći i za lokalne zajednice i za kantone i Federaciju BiH.

G-din Ivo Jerkić predlaže da se ide na usvajanje Strategije lobiranja, te napominje da će biti mogućnosti da se i pod tačkom „Lobiranje i zastupanje“ još razmatra o ovim stvarima i moli da se diskusija o ovoj tački nastavi poslije ručka, a da se sada Strategija usvoji.

G-din Petar Polić navodi da će biti jako kratak, pozdravlja prisutne i izražava zadovoljstvo zbog činjenice da skupu prisustvuje premijer Federacije BiH kao bi mogao čuti probleme i lokalnih zajednica. Ističe da se slaže sa kolegama koji su ranije govorili i naglašava da će iznijeti jedan podatak. Navodi da je 2005. godine Komunalno preduzeće Posušje, a što je bio slučaj i u općinama Cazin i Tomislavgrad, uzelo

kredit od Svjetske banke gdje su garant bili općina, kanton i Federacija BiH i gdje Federacija BiH od tog preduzeća uzima 2 % od ukupnog kredita, što znači da je Općina Posušje dobila 102 000 eura za kredit koji je bio 5 miliona. Naglašava da slijedi blokada Općine Posušje kao i drugih općina koje su uzele te kredite i da već dobivaju opomene od strane Ministra finansija Federacije BiH. Navodi da su tražili da se to prolongira za neka bolja vremena ili za godinu dana kada počnu otplaćivati taj kredit, ali da nisu dobili nikakav odgovor od Ministra finansija. Smatra da je to jedna nekorektna saradnja između Federacije BiH i lokalnih zajednica i još napominje da kanton od ukupnog kredita uzima 1,5 %.

G-din Ivo Jerkić zahvaljuje g-dinu Petru Poliću i daje na glasanje Strategiju lobiranja Saveza.

Strategija lobiranja Saveza općina i gradova Federacije Bosne i Hercegovine je jednoglasno usvojena.

6. Odluka o izmjeni Odluke o obrazovanju Komisije za razvoj i unapređenje lokalne samouprave

G-din Ivo Jerkić navodi da se ovdje radi o tehničkoj zamjeni osobe, te smatra da nema potrebe za dodatnim obrazloženjima.

G-din Vlado Alilović konstatuje da se radi o promjeni osobe zbog činjenice da je ista izabrana za delegata u Skupštini Unsko-sanskog kantona i predlaže da se odluka usvoji.

Odluka o izmjeni Odluke o obrazovanju Komisije za razvoj i unapređenje lokalne samouprave je jednoglasno usvojena.

7. Informacije:

a) Plan rada Saveza općina i gradova Federacije Bosne i Hercegovine za period 2011. – 2012. godina

G-din Ivo Jerkić daje riječ g-đi Vesni Travljanin.

G-đa Vesna Travljanin ističe da ovdje nema ništa dodati u ime Stručne službe nakon izlaganja načelnika, te navodi da je Savez u funkciji općina i da radi onako kako je najbolje za sve, a da naravno trebamo raditi i više i bolje, a naročito u oblasti lobiranja i najavljuje tematsku raspravu u nastavku sjednice Skupštine na tu temu. Napominje da se na sjednici vodi Zapisnik i da će Zaključci biti upućeni svim nivoima vlasti. Ističe da se Plan rada Saveza odnosi na normativni dio i da je krajnje vrijeme da se usvoje zakoni na kojima se radilo. Napominje da postoji niz zakona na kojima je Savez radio, a koji se nalaze u proceduri Vlade Federacije BiH i naglašava da mi molimo i potenciramo da se oni upute u daljnju proceduru. Naglašava da su sve skupštinske komisije Saveza pred ovu Skupštinu provele analizu u smislu određivanja proritetnih zakonskih propisa na čijem će se usvajanju insistirati, a to su: Zakon o zaposlenicima u organima jedinica lokalne samouprave, Zakon o raspodjeli javnih prihoda, Zakon o koncesijama, Zakon o šumama, Zakon o matičnim knjigama, Zakon o premjeru i katastru nekretnina i Zakon o stvarnim pravima. Napominje da se Plan rada Saveza odnosi na zakonodavne aktivnosti, ali da Savez radi i na nizu drugih oblasti što se moglo vidjeti iz Izvještaja o radu Predsjedništva, Izvještaja o radu komisija i iz Strateškog plana. Ističe da je Savez preuzeo i ulogu pružanja usluga treninga članicama, dok se čeka na usvajanje Strategije obuke za jedinice lokalne samouprave od strane Vlade Federacije BiH, da je održano niz radionica i to: iz oblasti trezorskog poslovanja, oblasti zaduživanja jedinica lokalne samouprave i drugih oblasti, te da je inovirana web stranica Saveza koja se svaki dan ažurira čime

se osavremenjuje rad Saveza. Navodi da načelnici općina najbolje znaju kakvi su problemi na terenu i da će Savez slušati i raditi.

G-din Ivo Jerkić otvara raspravu.

G-dica Belma Gijo ispred Instituta za razvoj mladih – KULT navodi da je vidjela dobru priliku da se sada javi i ističe da Savez u nevladinom sektoru ima partnera kada je u pitanju implementacija zakona. Naglašava da Institut za razvoj mladih – KULT radi na implementaciji Zakona o mladima Federacije BiH i da su mnoge od općina koje su se javljale, kao što je npr. Općina Glamoč, sudjelovale u ovom projektu. Naglašava da je Institut za razvoj mladih – KULT izradio Vodič kroz Zakon o mladima, te informiše prisutne da rade na formiranju Vijeća mladih i da će napraviti platformu, on-line bazu omladinskih udruženja, što je također i zakonska obaveza svih općina da i one to urade. Ističe da će izraditi statut i ostale potrebne materijale za formiranje Vijeća mladih kako bi olakšali taj proces i pomogli općinama da to urade.

G-din Hamdo Ejubović napominje da je održan sastanak pet skupštinskih komisija Saveza na kojem je izrađen ovaj materijal i da je ovo Plan rada koji je prilično komotan za Savez i za period od jedne godine, te navodi da bi članice Saveza bile zadovoljne da se 50 % od ovoga realizuje. Ističe da se ovlašćuje Predsjedništvo Skupštine Saveza da ispred nas izabere šta je tih 50 %.

G-din Ivo Jerkić daje na glasanje Plan rada Saveza.

Plan rada Saveza općina i gradova Federacije Bosne i Hercegovine za period 2011. – 2012. godina je jednoglasno usvojen.

G-din Ivo Jerkić predlaže da se napravi pauza za ručak i najavljuje nastavak sjednice za 14.30 sati.

8. Tekuća pitanja

- **Informacija sa održane Konferencije „Zaduživanje jedinica lokalne samouprave“**

G-din Ivo Jerkić informiše prisutne da predstavnik Federalnog ministarstva finansija g-din Samir Bakić danas nije bio u mogućnosti prisustvovati skupu, ali da imamo pisanu informaciju o konferenciji.

- **Lobiranje i zastupanje (predavač: g-đa Hafeza Sabljaković, poslanica u Predstavničkom domu Parlamenta Federacije BiH)**

G-đa Hafeza Sabljaković je izvršila prezentaciju na temu: „Lobiranje i zastupanje“. Prezentacija se nalazi u prilogu ovog zapisnika.

G-din Ivo Jerkić zahvaljuje g-đi Hafezi Sabljaković.

G-đa Vesna Travljanin predlaže da se Zaključci sa Skupštine upute svim poslanicima i delegatima u Parlamentu Federacije BiH poimenično, jer je gospođa Sabljaković u svojoj prezentaciji navela imena svih članova Parlamenta Federacije BiH sa navođenjem općina i političkih stranaka iz kojih isti dolaze.

G-din Ivo Jerkić izražava slaganje da prijedlogom g-đe Vesne Travljanin.

G-din Radovan Marković ističe da to nije dobar pristup i navodi problem u vezi sa Zakonom o šumama u Općini Glamoč.

- **Predstavljanje rezultata projekata saradnje norveških općina i općina iz Federacije BiH**

U okviru ove tačke prezentacije su izvršili predstavnici Grada Mostara i općina Donji Vakuf i Konjic. Prezentacije se nalaze u prilogu ovog zapisnika.

- **Zatvaranje Šeste sjednice Skupštine Saveza općina i gradova Federacije Bosne i Hercegovine**

G-din Vlado Alilović apelira na članove Skupštine Saveza da redovno izmiruju svoje obaveze po pitanju uplate članskog doprinosa Savezu.

Nakon što je konstatovao da su sve tačke Dnevnog reda iscrpljene, **g-din Ivo Jerkić** zatvara Šestu Skupštinu Saveza općina i gradova Federacije Bosne i Hercegovine u 16 sati i 32 minute.

Predsjedavajući Skupštine Saveza
Ivo Jerkić, s.r.